

Tuzla, 05.03.2024.
Broj: KP-I-56/25

CILJEVI I KRITERIJI ZA DODJELU GRANTOVA U OKVIRU POZIVA ZA PODRŠKU JAČANJA KAPACITETA ORGANIZACIJA CIVILNOG DRUŠTVA U TUZLANSKOM KANTONU

I UVOD

Fondacija tuzlanske zajednice (FTZ) objavila je poziv za sufinansiranje projekata organizacijama civilnog društva (OCD) sa područja Tuzlanskog kantona (TK) kako bi ojačale svoje organizacijske kapacitete i kako bi unaprijedile odnos prema svojim članovima/korisnicima, te ostvarile veći uticaj u zajednici i u području svog djelovanja.

Poziv za sufinansiranje projekata je dio aktivnosti koje se odnose na pružanje podrške jačanju kapaciteta OCD-a u okviru projekta „Jačanje civilnog društva i demokratske kulture u TK“, koji se realizuje uz finansijsku podršku Saveznog ministarstva za privrednu saradnju i razvoj Republike Njemačke i Freudenberg Fondacije.

Za tu namjenu, Fondacija je u 2025. godini obezbijedila **15.000,00 KM**.

II CILJ POZIVA:

Uz mentorsku i savjetodavnu podršku OCD-a sa područja TK, cilj je dodatno i finansijski osnažiti kapacitete najmanje **tri OCD-a** tako da njihov rad bude dugoročno održiv, transparentan, prepoznatljiv u lokalnoj zajednici i području djelovanja, a što je najvažnije, višestruko koristan za njihove članove i korisnike.

III PODRUČJE DJELOVANJA:

Podrška se provodi na području Tuzlanskog kantona (TK).

IV KO MOŽE APLICIRATI?

Formalno registrovane OCD koje imaju sjedište na području TK, a koje su u Programu mentorske podrške Fondacije tuzlanske zajednice (ciklus 2024/2025). Sa organizacijama koje imaju priliku aplicirati, završena je procjena organizacijskih kapaciteta, te su potpisali Sporazum o saradnji sa Fondacijom tuzlanske zajednice na programu jačanja kapaciteta OCD sa područja TK.

V ROK ZA PRIJAVU

Poziv za prijem aplikacija otvoren je **od 07. marta do 28. marta 2025. godine**.

VI NAČIN REALIZACIJE SREDSTAVA

U skladu s dole navedenim Kriterijima poziva, FTZ će dodjeliti podršku za najmanje 3 (tri) OCD iz TK u maksimalnom iznosu od 5.000 KM po grantu. Ugovor o dodjeli sredstava će FTZ potpisati sa odabranim OCD-a najkasnije do 30.04.2025. **Svi projekti moraju biti realizovani do 30.10.2025. godine, bez mogućnosti produženja za utrošak sredstava ili završetak projektnih aktivnosti.**

VII ŠTA MOŽEMO PODRŽATI?

Projekti koji budu podržani kroz ovaj poziv trebaju da unaprijede organizacijske kapacitete u oblastima koje su u fazi "Procjena organizacijskih kapaciteta" iskazane kao prioritetne oblasti. U tom smislu projekti koji budu podržani treba da doprinesu jačanju članstva, razvoju aktivnosti i programa i jačanju uticaja u zajednici u kojoj djeluju; unaprijeđuju njihovu saradnju sa korisnicima, partnerima, donatorima i kreiraju veće povjerenje javnosti uopšte. U okviru projekata prihvatljive su sljedeće aktivnosti:

- aktivnosti usmjerene na razvoj članstva organizacije (aktivnosti za unaprijeđenje rada upravljačkih i izvršnih tijela organizacije, rada timova, aktivnosti usmjerene na razvoj članstva organizacije);
- aktivnosti usmjerene na unaprijeđenje programa i usluga koje organizacija provodi prema članovima/korisnicima (podrška unaprijeđenju postojećih ili razvoju novih usluga/aktivnosti za članstvo poput: aktivnosti koje doprinose promociji ljudskih prava (online kampanje, radionice, izložbe, predstave, informativne brošure i sl.), zaštitu životne sredine (realizacija ekoloških projekata, edukacije, mjere pročišćavanja zraka, odvajanje otpada, itd), i druge oblasti djelovanja organizacija/udruženja;
- aktivnosti usmjerene na jačanje finansijske održivosti organizacija, poput kampanje namicanja sredstava za ciljeve organizacije;
- aktivnosti usmjerene na jačanje transparentnosti organizacija (poput aktivnosti kreiranja i izradu politika, procedura u oblastima transparentnog i odgovornog i etičnog poslovanja; aktivnosti efikasnog izvještavanja informisanja javnosti o rezultatima rada putem web stranica i/ili drugih online medija, godišnjih izvještaja, informativnih biltena, video materijala, medijskih nastupa i drugih načina informisanja);
- aktivnosti usmjerene na internu i eksternu kontrolu finansijskog poslovanja (revizija).

Navedene aktivnosti predstavljaju moguće primjere aktivnosti koje se mogu predložiti u projektima, ali nisu limitirane na iste, nego se mogu proširiti u skladu sa ciljevima poziva i potrebama aplikanta.

VIII ŠTA NE MOŽEMO PODRŽATI?

- Otplata dugova, kredita i re-granting;
- Projekte koji su već završeni;
- Aktivnosti u korist promocije političkih i vjerskih institucija, ideologija i praksi;
- Aktivnosti koje promovišu nasilje, mržnju ili bilo koji vid diskriminacije.
- Aktivnosti i događaji koji na bilo koji način štete okolišu, te u skladu s tim želimo skrenuti pažnju aplikantima da u planiranju i realizaciji vode računa da koriste biorazgradive materijale koji ne predstavljaju opasnost za okoliš i živi svijet;
- Projekti u korist pojedinaca (studijska i profesionalna usavršavanja, stipendije, liječenje, rješavanje stambenog pitanja, razvoj biznisa, humanitarne akcije, itd);
- Projekti i aktivnosti usmjerene na redovne operativne troškove za rad udruženja, osim ako isti nisu direktno vezani za realizaciju projekta;
- Projekte koji se realizuju izvan Tuzlanskog kantona;
- Troškove koji se odnose na nabavku alkoholnih pića, duhanskih proizvoda, oružja;
- Troškovi koji uključuju najam i kupovinu opreme od neregistrovane kompanije ili od strane fizičkih lica.
- Ne možemo podržati troškove rentanja vozila za prevoz;
- Dodjele humanitarne pomoći ili dodjele donacije drugima kroz podržani projekat;

IX NAČIN PRIJAVE

OCD uključene u program mentorske podrške Fondacije tuzlanske zajednice mogu aplicirati samo sa jednim prijedlogom projekta, isključivo popunjavanjem projektne aplikacije na linku ispod:

<https://baza.fondacijatz.org/Client/ClientOnlineAppStart>.

FTZ tim će, nakon uvida u aplikacije, poslati PDF verziju projektne aplikacije putem emaila, koju aplikant treba dostaviti u roku od 5 dana, potpisanu i ovjerenu, u dva štampana primjerka, na adresu FTZ: Pozorišna br. 13, 75000 Tuzla (lično ili poštom).

FTZ neće uzeti u razmatranje nepotpune aplikacije, kao ni one koje pristignu nakon navedenog roka ili ne budu dostavljene na prethodno navedeni način.

Ukoliko vam je potrebna podrška pri ispunjavanju aplikacije možete se obratiti direktno u kancelariju Fondacije tuzlanske zajednice, na broj telefona 035/363-388. Kontakt osoba ispred Fondacije je Nema Sakić ili putem mail-a: inicijative@fondacijatz.org sa naznakom: „**Jačanje kapaciteta OCD u TK**“.

X POTREBNA DOKUMENTACIJA ZA PRIJAVU

Uz on-line aplikaciju, koju svaki aplikant dostavlja obavezno poštom, potrebno je obavezno poslati sljedeće dokumente:

- Rješenje o registraciji (kopija prvog i posljednjeg rješenja), samo za aplikante koji prvi puta apliciraju prema FTZ (kopija),
- Statut organizacije, samo za aplikante koji prvi puta apliciraju FTZ (kopija),
- Finansijski izvještaj za prethodnu godinu/Bilans stanja i Bilans uspjeha (kopija),
- Dokaz o otvorenom žiro računu u banci (kopija) i
- Izjavu/e o partnerstvu, ako se radi o partnerskim projektima.

XI KRITERIJI ZA OCJENU PROJEKATA

Komisija za vrednovanje prijedloga projekata (u daljem tekstu Komisija) će biti imenovana od strane direktorice, iz reda FTZ-a. Komisija je dužna da najprije izvrši administrativnu provjeru zahtjeva u skladu sa gore navedenim načinom apliciranja i obaveznim dokumentima za dostavljanje u ured FTZ-a. Ukoliko je prijedlog projekta zadovoljio administrativne zahtjeve, Komisija će provjeriti da li je isti usklađen sa opštim kriterijima. Ukoliko nije, projekat neće biti uzet u dalje razmatranje. Ukoliko Komisija utvrdi da su zadovoljeni opšti kriteriji, nastaviće sa vrednovanjem projekta prema dole navedenim kriterijima.

11.1. OPŠTI KRITERIJI

- Aplikant može aplicirati samo sa jednim projektom.
- Prijedlozi projekata treba da budu relevantni u odnosu na temu javnog poziva.
- Potraživana sredstva treba da pokriju troškove vezane za realizaciju aktivnosti koje će pomoći OCD-a iz TK da poboljšaju interne kapacitete i performanse za uspostavljanje i razvoj članstva svoje organizacije, unaprijeđenje programa, te namicanje sredstava na samoodrživ način.
- Projekti trebaju da imaju dugoročan efekat na održivost OCD-a i da rezultate projekta mogu koristiti nakon završetka istog.
- Predloženi projekat se mora realizovati u periodu od 01.05.2025. do 30.10.2025.
- Trajanje predloženog projekta može biti maksimalno 6 mjeseci.
- Aplikant je obavezan sufinansirati projekat u iznosu od najmanje 33% od ukupne vrijednosti projekta. Ukoliko se projekat dijelom sufinansira kroz volonterski rad ili kroz donacije u robi, opremi ili materijalu, to mora biti jasno izraženo u novčanim jedinicama u aplikaciji.

11.2. SPECIFIČNI KRITERIJI ZA VREDNOVANJE

Komisija vrši rangiranje projektnih prijedloga na osnovu izvršenog bodovanja prema dole navedenim kriterijima. Prvoplasirani projektni prijedlog je onaj koji ima najveći zbir bodova, a slijedi projekat s prvim sljedećim nižim zbirom bodova i tako do najnižeg zbira osvojenih bodova.

Samo projekti koji su dobili ukupno preko 60 bodova mogu biti uzeti u razmatranje za finansijsku podršku, jer projektni prijedlozi ispod ovog praga nisu u stanju zadovoljiti postavljene standarde poziva, te bi efikasnost njihove provedbe bila upitna. Podrška će biti dodijeljena najbolje rangiranim projektima, zavisno od raspoloživih sredstava.

Kriterij:	Maksimalan broj bodova:
Kriterij 1 - Relevantnost predloženih aktivnosti, metoda i alata u odnosu na temu poziva	20
1.1. Da li je prijedlog projekta u korelaciji sa temama koje su navedene u ovom pozivu?	5
1.2. Koliko su predloženi pristupi, metode i alati odgovarajući za ove teme?	5
1.3. Da li je tema relevantna za identifikovani problem i potrebu ciljne grupe/aplikanta?	5
1.4. Da li je tema inkorporirana u strateški razvoj aplikanta?	5
Kriterij 2 – Jasno definisana potreba ciljne grupe za predloženim projektom	15
2.1. Da li predloženi projekat odgovara na prioritete ciljne grupe/aplikanta?	5
2.2. Da li je aplikant jasno obrazložio problem, odnosno potrebe ciljne grupe/aplikanta sa izvorima podataka?	5
2.3. Koliko će projekat koristiti ciljnoj grupu/aplikantu i da li korist od projekta ima manja ili veća ciljna grupa?	5
Kriterij 3 – Kapacitet aplikanta da uspješno realizuje projektne aktivnosti	15
3.1. Koliko je jasno predstavljen predloženi projektni tim i sposobnosti istog da iznese predložene aktivnosti i budžet projekta?	5
3.2. Koliko će u projekat biti uključeni zaposlenici i volonteri sa svojim iskustvima i znanjima?	5
3.3. Kakva je saradnja sa drugim sektorima, medijima i drugim organizacijama?	5
Kriterij 4 - Usklađenost planiranih aktivnosti sa traženim sredstvima	20
4.1. Da li je budžet realističan i u skladu sa predloženim aktivnostima?	5
4.2. Da li je učešće aplikanta jasno definisano, kao i drugi izvori finansiranja?	5
4.3. Da li su jedinične cijene u skladu sa aktuelnim cijenama na tržištu?	5
4.4. Može li se sa traženim sredstvima u potpunosti riješiti problem ili se rješava samo dio problema?	5
Kriterij 5 - Značaj projekta za jačanje kapaciteta i dugoročnu održivost rada aplikanta	30
5.1. Da li će aplikant ojačati kapacitete i dugoročno koristiti rezultate projekta za transparentan i odgovoran rad?	5
5.2. Da li će projektne aktivnosti unaprijediti vidljivost aplikanta u zajednici?	5
5.3. Da li će projekat doprinijeti jačanju ugleda i uticaja aplikanta u zajednici?	5

5.4. Da li će aplikant ojačati partnerstva sa drugim sektorima?	5
5.5. Da li će projekat uticati na jačanje civilnog sektora u cjelini?	5
5.6. Da li se projekat može prikazati kao pozitivna priča za sistemsku promjenu?	5
MAKSIMALAN UKUPNI ZBIR	100

Svi aplikanti će biti pismeno obaviješteni o odlukama Komisije, bez obzira da li im je odobrena podrška ili ne. Po finalnom odabiru aplikacija i objavljivanju rezultata na web stranici Fondacije bit će otvoren rok za prigovore u trajanju od 7 radnih dana. Pravo na prigovor imaju aplikanti koji iz određenih razloga nisu zadovoljni odlukom.

XII POTPISIVANJE UGOVORA SA ODABRANIM APLIKANTIMA

Aplikanti čiji projekti budu odabrani za podršku će potpisati Ugovor o dodjeli granta sa FTZ u kojem će biti definisani uslovi za transparentno i odgovorno trošenje doniranih sredstava.

Ugovor o dodjeli sredstava će FTZ potpisati sa odabranim OCD-a najkasnije do 28.04.2025. Svi projekti moraju biti realizovani do 30.10.2025., bez mogućnosti prodruženja za utrošak sredstava ili završetak projektnih aktivnosti.



U Tuzli, 05.03.2025. godine

Jasna Jašarević

Jasna Jašarević